



PANANGARAMID A NARAG-O ITI MINISTERING

Ti panagserbi nga addaan iti ayat ket mangsangbay nga agpada iti rag-o iti mangmangted ken ti umaw-awat.

No dadduma ti panagsapsapultayo iti ragsak iti daytoy a biag ket kasla maipada iti panagtaray iti maysa a treadmill. Agtultuloytayo iti panagtaray ngem mariknatayo a saantayo pay a nakadanon iti sadino man. Para iti dadduma, ti kapanunotan maipapan iti panagserbi iti dadduma ket panangrikna laeng a kasla panangnayon iti ad-adu pay nga aramiden.

Ngem tarigagayan ti Nailangitan nga Amatayo a padasentayo ti rag-o ket imbagana kadatayo “ti panggep dagiti tao, ket tapno maaddanda iti ragsak” (2 Nephi 2:25). Ket insuro ti Mangisalakan a ti panagserbi kadagiti dadduma ket napateg a paset iti no

kasano a maisangbaytayo iti rag-o iti biagtayo ken iti biag dagiti dadduma.

Ania ti Rag-o?

Ti rag-o ket kaipapananna ti “maysa a panagrikna iti dakkel a ragsak.”¹ Nangted dagiti propeta iti ududina nga aldaw iti pannakailawlawag ti no sadino ti nagtaudan ti rag-o ken no kasano a masarakan daytoy. “Ti rag-o a mariknatayo ket saan nga agpannuray kadagiti pasamak iti biagtayo no di ketdi agpannuray iti panangipamaysatayo iti biagtayo,” kinuna ni Presidente Russell M. Nelson. “. . . Aggapu ti rag-o manipud ken gapu ken ni [Jesucristo]. Isu ti pagtaudan ti amin a rag-o.”²

Mangisangbay iti Rag-o ti Ministering

Idi nakiranud ni Lehi iti bunga ti kayo ti biag, napno ti kararuana “iti nalaus a ragsak” (1 Nephi 8:12). Ti umuna a tarigagayna ket mangibinglay iti daytoy a bunga kadagiti ipatpategna.

Ti kinatallugodtayo nga agserbi kadagiti dadduma ket makaisangbay iti daytoy a kita ti rag-o kadatayo ken kadakuada. Insuro ti Mangisalakana kadagiti disipulona a ti bunga nga isangbaytayo no naisilpoytoy Kenkuana ket makatulong a mangyeg kadatayo iti pakabuklan ti rag-o (kitaen iti Juan 15:1–11). Ti panangitrabaho iti aramidna babaen ti panagserbi ken panangikarigatan a mangyasiddeg kadagiti dadduma Kenkuana ket mabalina a naragsak a padas (kitaen iti Lucas 15:7; Alma 29:9; Doktrina ken Katulagan 18:16; 50:22). Mapadasantayo daytoy a rag-o uray no maipasangotayo iti panagsusupiat ken panagsagaba (kitaen iti 2 Taiga Corinto 7:4; Taiga Colosas 1:11).

Impakita ti Mangisalakana kadatayo ti naan-anay a pagwadan a maysa kadagiti kaindaklanan a pagtau-dan ti pudno a rag-o iti mortal a biag ket masarakan babaen iti serbisio. No agministertayo kadagiti kakabsattayo a lallaki ken babbai kas iti Mangisalakana, nga addaan iti asi ken ayat iti puspustayo, mapadasantayo ti rag-o a nangnangruna pay ngem iti simple a ragsak.

“No awatentayo ti [ministering] nga addaan iti natallugod a puso, as-asidegtayonto . . . iti panangbalin a tattao iti Zion ken mariknatayonto ti aglaplapusanan a rag-o kadagiti tao a tinulongantayo iti dana ti kinadisipulo,” insuro ni Sister Jean B. Bingham, Relief Society General President.³

Kasano a Maaramidtayo a Naragrag-o ti Ministering?

Adu dagiti wagas a pakaisangbayan ti dakdakkal a rag-o iti ministering. Adtoy ti sumagmamano a kapanunotan:

1. **Maawatam ti panggepno iti ministering.** Adu dagiti gapu iti panag-minister. Kangrunaanna, nasken a maibatog dagiti panagkagumaantayo kadagiti panggep ti Dios “ti mangipatungpal iti saan nga ipapatay ken agnanayon a biag ti tao” (Moises 1:39). No awatentayo ti awis ni Presidente Russell M. Nelson a mangtulong kadagiti dadduma iti dana ti katulagan, makasaraktayo iti rag-o iti pannakiraman iti aramid ti Dios.⁴ (Para iti ad-adu pay maipapan iti panggep ti ministering, kitaen iti “Dagiti Pagbatayan iti Ministering: Ti Panggep a Mangbalaliwto iti Ministeringtayo,” iti Enero 2018 *Liahona*.)
2. **Aramidenyo ti ministering maipapan kadagiti tao saan a dagiti aramiden.** Masansan nga impalagip

ni Presidente Thomas S. Monson kadatayo: “Saanyo nga ipalubos ti maysa a problema a masolbar nga agbalin a napatpateng ngem iti maysa a tao a maayat.”⁵ Ti ministering ket maipapan iti panagayat kadagiti tao, saan a maipapan kadagiti banag nga aramiden. No dumakkal ti panagayattayo a kas iti inaramid ti Mangisalakana, ad-adda a nakasaganatayo iti rag-o a sumangbay manipud iti panagserbi kadagiti dadduma.

3. **Aramidenyo a simple ti ministering.** Ibagi kadatayo ni Presidente M. Russell Ballard, Agak-akem a Presidente ti Korum dagiti Sangapuloket-dua nga Apostol: “Maipatungpal dagiti naindaklan a banag babaen dagiti gagangay ken babassit a banag. . . . Dagiti babassit ken gagangay nga aramid ti kinaimbag ken serbisio ket agkakapengto iti maysa a biag a napnuan iti ayat para iti Nailangitan nga Ama, kinapasnek iti aramid ni Apo Jesucristo, ken maysa a kaipapanan ti kappia ken rag-o iti tunggal kanito a tulongantayo ti tunggal maysa.”⁶
4. **Ikkatenyo ti stress manipud iti ministering.** Saanyo a pagrebbengan ti mangitrabaho iti pannakaisalakana ti maysa a tao. Dayta ket nagbaetan ti tao ken ti Apo. Ti pagrebbengantayo ket ayaten ida ken tulongan ida nga agsubli ken ni Jesucristo, nga Isu ti Mangisalakanda.

Saanyo nga Itantan ti Rag-o ti Panagserbi

No dadduma agkedked dagiti tao nga agkiddaw iti kasapulan a tulong, isu a ti panangidiaya iti serbisiotayo ket mabalina a dayta laeng ti kasapulanda. Ngem ti panangipapilit iti bagitayo kadagiti tao ket saan met a sungbat. Ti panangdawat iti permiso sakbay ti ministering ket nasayaat nga ideya.

Imbaga ni Elder Dieter F. Uchtdorf ti Korum dagiti Sangapuloket-dua nga Apostol maipapan iti awan asawana nga ina a nagsakit iti tuko [chicken pox]—ket kalpasanna nagtuko met dagiti annakna. Ti gagangay a nadalimanek ken nadalus a balay ket nagbalin a nawara ken narugit. Sangabunton dagiti maugasan a pangangan ken malabaan.

Iti apagkanito idi mariknana ti nalaus a pannakaupay, nagtuktok iti ridawna dagiti kakabsat iti Relief Society. Saanda nga imbaga ti, “Ipakaammoyo laeng kadakami no adda maitulongmi.” Idi makitada ti kasaad, dagus a nagtignayda.

“Nagdalusda, nangisangbayda iti lawag ken silnag iti pagtaengan, ket tinawaganda ti maysa a gayyem tapno mangyeg kadagiti sumagmamano a kasapulan unay a grocery. Idi iti kamaudiananna naileppasda ti aramidna ken nagpakadada, pinanawanda dayta ubing

nga ina nga aglulua—dagiti lua ti panagyaman ken ayat.”⁷

Agpada a nakarikna iti bara ti rag-o dagiti mangted ken ti umawat.

Mangpadur-as iti Rag-o iti Biagyo

Ti ad-adda a rag-o, talna, ken pannakapnek a mapadur-astayo iti biagtayo, ad-adda met a kabaelayontayo ti mangibinglay kadagiti dadduma kabayatan ti panag-ministertayo. Umay ti rag-o babaen ti Espiritu Santo (kitaen iti Taga Galacia 5:22 ken Doktrina ken Katulagan 11:13). Maysa daytoy a banag a maikaragantayo (kitaen iti Doktrina ken Katulagan 136:29) ken mayawistayo iti biagtayo. Adtoy ti sumagmamano nga ideya para iti panangpadur-as iti rag-o iti bukodtayo a biag.

1. **Bilangenyoy dagiti parburyo.** Bayat ti panangamisyo iti biagyo, isuratyo iti journalyo dagiti banag a nangparaburan ti Dios kadakayo.⁸ Imutektekam ti nasayaat iti amin nga aglawlawyo.⁹ Mangikasokayo iti no ania ti makalapped iti panangriknayo iti rag-o ket isuratyo dagiti wagas a mangresolba wenno mangawat a nasaysayaat kadagitoy. Iti panawen ti Paskua ti Panagungar, maaddaan iti oras a mangsukisok iti dakdakkal a pakainaigan iti Mangisalak (kitaen iti Doktrina ken Katulagan 101:36).
2. **Sanayenyo ti kinamananglaglagip.** Nalaklaka a masarakanyo ti rag-o kadagiti kanito ti naulimek a panagutob.¹⁰ Denggenyo a nasayaat ti no ania ti isangbay kadakayo ti rag-o (kitaen iti 1 Cronicas 16:15). Ti panangisardeng a panangbubos iti oras manipud iti media ket mabalina a kasapulan no dadduma iti panangsanay iti kinamananglaglagip.¹⁰
3. **Liklikanyo ti panangikumpara iti bagiyo.** Nakuna a ti panangikumpara ket mananakaw ti rag-o. Imbalaag ni Pablo nga isuda “no agririnnukodda

ket agpipinnadisa nga is-isuda, dida maawatan” (2 Taga Corinto 10:12).

4. **Agkagumaankayo a manggun-od iti bukod a paltiing.** Insuro ti Mangisalak: “No agdawatkayo, umawatkayo iti paltiing iti kada paltiing, pagsiriban iti kada pagsiriban, tapno maammuanyo dagiti datlag ken makapatalingengen a banag—a mangyeg iti ragsak, a mangyeg iti agnanayon a biag” (Doktrina ken Katulagan 42:61).

Awis nga Agtignay

Kasano a mapadakkelyo ti rag-o a masarakanyo iti biagyo babaen ti ministering?

Dagiti pagbatayan iti daytoy nga artikulo ket mabalina a yaplikar iti inaldaw a pannakipulapoltayo ngem nairantada a mangtulog kadagiti kakabsattayo a lallaki ken babai iti panagkagumaanda a mangparabur kadagiti individual ken pamilia a naidutok kadakuada.

DAGITI NAGADAWAN

1. “Joy,” en.oxforddictionaries.com
2. Russell M. Nelson, “Joy and Spiritual Survival,” *Liahona*, Nob. 2016, 82.
3. Jean B. Bingham, “Ministering as the Savior Does,” *Liahona*, Mayo 2018, 107.
4. Russell M. Nelson, “As We Go Forward Together,” *Liahona*, Abril 2018, 4–7.
5. Thomas S. Monson, “Finding Joy in the Journey,” *Liahona*, Nob. 2008, 86.
6. M. Russell Ballard, “Finding Joy through Loving Service,” *Liahona*, Mayo 2011, 49.
7. Kitaen iti Dieter F. Uchtdorf, “Living the Gospel Joyful,” *Liahona*, Nob. 2014, 120–123.
8. Kitaen iti Henry B. Eyring, “O Remember, Remember,” *Liahona*, Nov. 2007, 67.
9. Kitaen iti Jean B. Bingham, “That Your Joy Might Be Full,” *Liahona*, Nob. 2017, 87.
10. Dieter F. Uchtdorf, “Of Things That Matter Most,” *Liahona*, Nob. 2010, 22.
11. Kitaen iti Gary E. Stevenson, “Spiritual Eclipse,” *Liahona*, Nob. 2017, 46.